

2. Kua hohonu haere ta tatou hopu i nga kaupapa o te whakaponono karaitiana. Kua haere mai te whakama ki te tangata whakaaro tika, mehemea ka korrerotia i te haurangi ia. Kua mohio tatou kaore i tika i runga i nga akoranga a nga karaipiture, kia whakahaurangi te tangata i a ia.
3. Ko te nuinga o tatou rangatira Maori kanui te kaha ki te peehi i taua kai, me te tohutohu ki nga taitamariki kia ngawari, kia mutu te kai waipiro. Titiro ake ki o tatou mema Pareutata, a Ta Maui Pomare, a Ta Apirana Ngata, a Tau Henare, a Hare Uru, me te tatou kaumatua o te whare Ariki, a Te Rikihana, katoa enei tangata, e tu tapu mai ana i mua i te iwi, kaore rawa e rangona ana kia kai nui i te waipiro enei tangata.
4. Na te uaua pea hoki o te kitea o te moni ka manawapa tatou ki te mounou noaiho i a tatou hereni. I mua he mama te haere mai o te moni, he mama hoki te haere atu. I nga wa ka huri, ka kore he moni, ka hoko i te whenua. Ka haere noa mai te moni, kaore i waiho ma te werawera o te rae e kimi, kaore te iwi o tera wa i mohio ki te wariu o te moni. Engari inaianei, i te mea kua uaua te haere mai o te moni, katahi ka tupato. He hua pai tenei no te tatou poharatanga.

MOA MOU TE MONI.

I roto i enei tau e toru ka taha ake nei, 1925 ki 1928, hui katoa te moni i pau ki te waipiro i nui Tireni nei, £25,839.693. Hui katoa nga tangata i mau ki te herchere, i whainatia mo te haurangi, i poropcihanatia ranei, e 26,725.

Ahako te uaua o te kitea o te mahi hei oranga mo te tangata i enei wa, he mama noaiho te kitea o te moni hei whakapau ki te kai-waipiro. Mehemea i whakapaua tenei rua tekau ma rima miriona pauna, ki nga mahi e puta ai he oranga totika mo te tangata, kaore e penei rawa te mate o nui Tireni. Mounou rawa tenei moni nui kia whakaheke mo te kakī noaiho o te tangata te take. Apiti ki te mounou, ko nga hua o taua mahi he kino, inahoki ra tenei ope nui te 26,725, i tu atu nei ki te aroaro o nga kai-whakawa, me nga whiu a te ture mo tena, mo tena.

Keianei nga mahi a te pakeha hei ata tirotiro ma tatou ma te iwi maori. Kaore he waipiro a o tatou tipuna Maori. He taru hou tenei i whai tahi mai i te heke pakeha ki nui Tireni. Kua eke tenei ki te kotahi rau tau e matakītaki ana tatou ki nga hua o te kai nei, me te marama o te kitea, kaore rawa he hua pai o taua kai. Ko te wawata kei a tatou katoa kei te iwi Maori i tenei wa, kia eke tatou ki nga taimata rangatira o te taha pakeha me te taha Maori. Haunga te eke takitahi, engari kia whakapiki te iwi katoa. Noreira, e te iwi nui tomo, akona a tatou tamariki kia tautoroatoro atu ki nga mea i mua, kia whai tonu atu ki te tohu, ki te utu whakahohe o te runga karangatanga a te Atua, i roto i a Karaiti Ihū. (Piripai 3, 13.11).